

Jagstatus 'red' buffels van uitsterwing



Sedert 1991 het die gemiddelde prys van buffels konstant gebly op veilings. Pryse het eers ná 18 jaar deur die R200 000-grens per dier gebreek en vier jaar later deur R1 miljoen. Die bedryf het verander van kommersieel tot stoetery-status, dus moet die teler daarvoor aanpassings maak. Moontlike opsies word bespreek om dit reg te kry.

ets van 'n buffel bekoor die mens al jare lank en dit is moeilik om in woorde vas te lê. 'n Skot wat ek in 1985 in Zimbabwe ontmoet het, beskryf dit dalk die beste. "The ultimate in life is drinking single malt Scotch whisky out of cut glass and watching buffalo on the banks of the Zambezi River."

Die buffel se voortbestaan in Afrika was in die verlede onderhewig aan siektes. Teen die einde van die agttiende eeu was dit runderpes, later nagana (die *Trypanosoma*-bloedparasiet wat daartoe aanleiding gegee het dat groot hoeveelhede wild geskiet moes word om vektorvrye sones te skep; 1920-1965), bek-en-kloueer in die middel 1900's en tuberkulose in die 1990's.

Runderpes het die afgelope 1 500 jaar sporadies in verskillende dele van Europa voorgekom en het sy oorsprong in Oos-Europa en Rusland gehad. Die siekte was tot 1896 afwesig in Suid-Afrika. Die besmetting was afkomstig uit Arabië of Indië en het met behulp van Italiaanse soldate al langs die Nyl af beweeg via die Skeurvallei na die Zambezivallei en tot aan die suidpunt van Afrika. Van Zimbabwe af het die siekte met trekosse na Suid-Afrika beweeg. In Maart 1896 het die siekte Bulawayo bereik, Mafeking in April, Vryburg in Mei, Herbert/Hay en Barkly-Wes in September en Kimberley in Oktober dieselfde jaar.

Om die beweging van beeste te beperk, is 'n doringdraadheining van 1 000 myl (so-

wat 1 609 km) lank en 'n myl (1,6 km) suid van die Oranjerivier opgerig. Dit het van Botswana tot by Lesotho gestrek. Polisiepartollië het die heining gepatrolleer om die beweging van beeste te monitor en stop te sit. 'n Touleier het die infeksie egter oor die heining gedra met besmette klere en vleis.

Robert Koch, 'n bekende bakterioloog, het begin om beeste in te ent met die gal van besmette diere. Hierdie tegniek het vrugte afgewerp en teen die einde van 1898 is meer as 2 miljoen beeste ingeënt.

Die siekte is in 1899 die laaste keer op die Transvaal-Botswana-grens aangeteken, maar na raming het nogtans 2,5 miljoen beeste en baie boksoorte gevrek.

Die siekte het ook daartoe gelei dat die laaste groot migrasies van springbokke (trek-bokke) tot 'n einde gekom het. Hierdie epidemie het waarskynlik die grootste invloed op buffelgetalle gehad en daartoe aanleiding gegee dat slegs 'n klein troppie buffels in die Addo-bos in die Oos-Kaap oorleef het.

Die epidemiologie van tripanosomiase (oftewel nagana) word deur vier biologiese faktore bepaal, naamlik die teenwoordigheid van die bloedparasiet (*Trypanosoma*), die tsetsevlug (*Glossina*), reservoir-draers (wilde soogdiere) en vee. Beeste is egter die diersoort waarby die toestand die meeste gediagnoseer en behandel word. Die wildsoorte wat as draers dien en waarby die siekte die meeste voorkom, is vlakvarke, bosvarke, duikers, koedoes, bosbokke en buffels.

Die tsetsevlug se habitat is bosryke gebiede wat vogtig is. Dit is dieselfde habitat wat die wildsoorte wat hierbo genoem is, verkies. Skietspanne het van 1920 tot 1965 altesaam 15 389 buffels uitgeskiet om nagana te voorkom: 8 635 in die destydse Betsjoeanaland (Botswana), 157 in Natal en 6 597 in die destydse Rhodesië (Zimbabwe).

GROOT VERLIESE WEENS BEK-EN-KLOUSEER


Die grootste natuurlike buffelbevolking in Suid-Afrika word in die Nasionale Kruger-



Die grootwildjagter R.J. Cunningham.



Hierdie beeste het in die vroeë 1900's op die grens tussen Suid-Afrika en Botswana weens runderpes gevrek. Die skatting is dat meer as 2,5 miljoen beeste gevrek het en vrylewende buffels uitgewis is. FOTO: J.S. LOOSELY



Lede van 'n skietspan in die destydse Natal. Van 1920 tot 1965 het skietspanne meer as 15 000 buffels in Suider-Afrika geskiet om nagana (slaapsiekte) wat deur tsetsevlug oorgedra word, te voorkom. FOTO: OVI

KORTOM

- Buffels se voortbestaan is in die verlede gekniehalter deur siektes.
- Na raming is daar vandag minstens 35 518 siektevrye buffels in Suid-Afrika en altesaam 60 000 buffels in private besit.
- Die oplewing in die wildbedryf het verseker dat voortrefflike bulle se teelmateriaal behoue bly.



Dr. Kobus du Toit is 'n wildveerts wat spesialiseer in die bestuursaspekte van die teel van skaars herbivoorspesies. In dié reeks van vyf aflewings oor buffels evalueer hy die groei in die bedryf, ontleed pryse wat buffels behaal, kyk na kenmerke waarvoor 'n mens moet selekteer, asook wêreldrekords, teelbeleid en faktore wat boere in ag moet neem as hulle met buffels wil teel.

Geborg deur: **App leopard.tv**

wildtuin aangetref. Die getalle wissel van 18 000 tot 30 000, na gelang van siektes en droogtes. In 1992 en 1993 is 1 000 buffels in die noordelike deel van die Krugerwildtuin dood weens miltsiekte.

Droogtes eis ook hul tol. In onderskeidelik 1994-'95 en 2016 het die droogtegreep daartoe aanleiding gegee dat meer as 10 000 diere op 'n keer gevrek het.

In 1990 is tuberkulose by die suidelike buffelbevolkings in die Krugerwildtuin gediagnoseer. Dié siekte is tans dwarsdeur die Krugerwildtuin tot by Pafuri versprei.

Die siekte wat egter die grootste meulsteun om die buffel se nek is, is bek-en-kloueer (uit die picornavirusfamilie). Dit is 'n siekte met 'n hoë morbiditeit (siektevoorkoms), maar 'n lae mortaliteit (vrektesyfer). Die virus het sewe tipes, waarvan SAT1, SAT2 en SAT3 in Suid-Afrika voorkom, met tipes A, O en Asia1 in ander dele van die wêreld. Lande wil nie virussoorte van ander lande kry wat nie in hul eie land voorkom nie.

Die buffel is 'n asimptomaties draer van die siekte en wys dus nie kliniese simptome daarvan nie. Buffels sal dus die virus oordra aan spleethoewige plaasdiere, soos beeste,

bokke, skape en varke.

Handelslande gebruik bek-en-kloueer om die beweging van landbouprodukte te beheer. In 2000 het buffels wat uit die Krugerwildtuin gebreek het, beeste van die plaaslike gemeenskappe met bek-en-kloueer besmet. Boere in die Letsitele-vallei het toe byvoorbeeld R100 miljoen se sitrus-uitvoer verloor omdat die uitbreking van bek-en-kloueer die uitvoer van alle landbouprodukte stopsit.

REUSEGROEI VAN BUFFELS IN PRIVATE BESIT

Die status van die buffelbevolking in Suid-Afrika in 1994 word in die **TABEL** op bl. 50 saamgevat. Volgens die tabel was daar dié jaar ongeveer 31 500 buffels in Suid-Afrika. Volgens die studie was 67,1% van die buffelbevolking met bek-en-kloueer besmet, 25,2% met korridorsiekte en 7,7% was siektevry. Daar was toe slegs 1 310 siektevrye buffels in private besit in Suid-Afrika.

Deur die onderstaande bevolkingsgroei-formule vir die tydperk van 1994 tot 2016 te gebruik, en met 'n netto bevolkingsgroei (geboortes minus sterftes) van 15%, is daar vandag minstens 60 000 buffels in private

besit in Suid-Afrika, waarvan ten minste 35 518 siektevry is.

$$\text{Bevolkingsgroei} = N = \text{No} \cdot e^{(e-\mu)t}$$

N = Buffelbevolking 1994
 No = Buffelbevolking 2016
 e = logaritmië funksie
 λ (lambda) = geboortes
 μ (mu) = sterftes
 t (tyd) = jare

In 1994 was daar net drie provinsies met altesaam 50 geregistreerde plase in Suid-Afrika: 6 in KwaZulu-Natal, 13 in Noordwes en 31 in Limpopo. Die toename in die groei van buffelplase kan in die **GRAFIEK** gesien word.

Vandag is daar meer as 2 800 buffelplase by die staat se afdeling van veeartsenydiens geregistreer.

DIE WAARDE VAN JAG

Koninklike families en politici het in die begin van die 1900's jagtogte onderneem. Die grootwildjagters was kleurrike figure en het saam met plaaslike spoorsnyers gesorg vir unieke jagervarings in die Afrikabos.

R.J. Cunningham het in 1909 die eerste ►

◀ en van die bes gedokumenteerde jagte saam met die destydse pres. Theodore Roosevelt van Amerika onderneem.

Teen ongeveer 1950, net ná die Tweede Wêreldoorlog, het die era van die “grootwildjagter” gevolg en jagters van oorsee wou die Groot Vyf kom jag. Die bekende Skots gebore jagter J.A. Hunter, wat later na Brits-Oos-Afrika verhuis het, het byvoorbeeld 350 buffels in sy leeftyd gejag.

Jagters het begin meeding om hul trofee in “Die Boek” te kry. Die erkende Rowland Ward *Records of Big Game (Africa)* het die eerste keer in 1892 verskyn. Volgens die 24ste uitgawe in 2014 is twee buffelbulle in Tanzanië aangeteken waarvan die horingwydte groter as 60 duim was, en 92 bulle met ’n wydte van 50 duim tot 60 duim uit meer as 700 buffels.

Volgens hierdie meetmetode is slegs die wydte van die horing gemeet en het die bulle van Oos-Afrika dié van Suid-Afrika met ’n dieper krul oortref.

Die Safari Club International (SCI) se meetmetode vir horings is in 1972 ontwikkel en neem die totale lengte

en die breedte van die horingknobbel (*boss*) in ag. Die SCI het vandag meer as 50 000 lede oor die wêreld heen wat lid is van 170 klubs.

’n Buffeljag in Suid-Afrika het in 1981 R1 500 gekos en sal jou vandag R150 000 uit die sak jaag, wat ’n honderdvoudige toename is.

Grootskaalse trofeejag kan groot skade aan voortreflike teelmateriaal aanrig. Dit kan nie toegelaat word nie, net soos Europese lande byvoorbeeld geensins sal toelaat dat jy ’n steen van een van hul ou kastele terugbring Suid-Afrika toe nie.

Die oplewing in die wildbedryf het verseker dat voortreflike bulle as teelmateriaal behoue bly vir teling in buffelkuddes. Hierdie bewaringsaksie van toptelmateriaal se waarde kan nie in geld uitgedruk word nie. Indien buffels nie ’n jagwaarde gekry het nie, sou dié diere se siekte-etiket hulle tot ’n bedreigde spesie verdoem het. **LBW**

*Hierdie reeks word geplaas danksy samewerking met **Leopard.tv**. Besoek www.leopard.tv vir meer inligting.*

STATUS VAN SUID-AFRIKA SE BUFFELBEVOLKING IN 1994

Regering	Provinsie	Siektevy	Bek-en-klou	Korridor	Totaal
Gouvernement	Limpopo	128	966	0	1 094
	Noordwes	300	0	0	300
	Gauteng	8	0	0	8
	Mpumalanga	4	15 384	0	15 388
	Vrystaat	60	0	0	60
	KwaZulu-Natal	241	0	7 878	8 119
	Oos-Kaap	280	0	0	280
	Wes-Kaap	0	0	0	0
	Noord-Kaap	15	0	0	15
	Subtotaal	1 036	16 350	7 878	25 264
	Persentasie	3,6	51,8	25,0	80,4
Private eienaars	Limpopo	763	3 983	0	4 746
	Noordwes	166	0	0	166
	Gauteng	55	0	0	55
	Mpumalanga	47	846	0	893
	Vrystaat	84	0	0	84
	KwaZulu-Natal	69	0	56	125
	Oos-Kaap	36	0	0	36
	Wes-Kaap	20	0	0	20
	Noord-Kaap	70	0	0	70
	Subtotaal	1 310	4 829	56	6 195
	Persentasie	4,1	15,3	0,2	19,6
Groototaal	2 346	21 179	7 934	31 459	

Bron: Winterbach, M.Sc., Universiteit van Pretoria, 1999.

STUMBELBLOC



BOU HUISMURE VIR R98,00/m²







Nader ons vir meer inligting:
www.stumbelbloc.com
 Sel 083 228 8036

MAAK JOU EIE BLOKKE EN BOU SELF